

*IBERO AMERICAN HIGHSCHOOL*

## Ta wordo reconoci pa departamento di Enseñansa Aruba



**ORANJESTAD**—Relaciona cu dia Internacional di Maestro nos redaccion a combersa cu administrado di Ibero American Highschool Sr. Tico Monte, cu tambe ta

traha yudando e school como boluntario fuera di orario di school. Ibero American Highschool ta un school na Ingles, cu ta acredita na Merca. Reconoci na Merca y tur pais na mundo. E school aki ta situa na San Nicolas. E ta un school cu tin e klasnan reparti di 1ste pa 3de y di 4de pa 6de basico cu ta primary school. Den e primary school tin mas of menos 14 pa 15 mucha den cada klas y tin un maestra y



un asistent pa atende un cantidad chikito di 15 mucha. E sistema cu ta wordo aplica na e scol ta e sistema di Montessori cu ta un duna les den grupo. Despues cu e alumno caba scol basico e ta sigui pa scol secundario cu ta Junior High di 7 pa 10 klas. Klasnan 11 cu 12 ta Senior High School. E school aki tin 306 alumno e aña aki cual a crece for di 248 alumno aña pasa, den e school completo. Ibero American highschool a habri su portanan na 2007.

Primary school a cuminsa na 2008. Mayoman pa diferente motibo ta prefera pa manda nan yiu un school priva, aunke cu nan tin cu paga. Un di e motibonan cu ta resalta ta e idioma Ingles, e mucha ta desaroya su mes mas miho den Ingles. Hopi mucha cu tin un problema pa siñamento y riba dje tin cu haya les na Hulandes, ta dificulta mas ainda posicion di e mucha. Muchanan awendia na Aruba ta expone nan mes na hopi

Ingles, manera por ehempel door di scucha canticanan na Ingles, weganan via computer na e idioma Ingles y tur programanan di television y caricaturanan ta na e idioma Ingles. E muchanan ta lanta ta scucha, papia y compronde hopi na Ingles. Pesey mes cu ora cu e mucha ta bay school y haya su lesnan na Ingles e por asocia su mes cu locual ta wordo siña na dje y bira mas comprendibel.

### UNIVERSIDAD DI ARUBA

Na momento cu e mucha tin su diploma den su man, e ta wordo reconoci pa departamento di enseñansa Aruba. Pues ora cu e mucha caba school e ta hiba su diploma pa Inspeccion di Enseñansa pa “waarmerk” su diploma. Si esey wordo haci e alumno por bay Universidad di Aruba, e por bay Universidad di Merca, di Hulanda y bisindario, tambe cualkier parti den Latino America. □